



Tir Yimyim

www.tiryimyim.in

e-mail : tiryimyim@gmail.com

Regd. No. RNI. NAGAAO/ 2004 / 13113. Postal-NE/RN-717.

TAPAK 6

Yangia anidakangma :



Tir Yimyim



tiryimyim@aolima



tir yimyim

TAPAK 7



Sikkim: Bhaichung Bhutia-i aniba party SDF den longjemogo

Taoba Pakistan PM Khan ano court kati jaoker

VOL. XXI NO. 47 (ADOK 47) DIMAPUR ROGONÜ (FRIDAY)

YIMPOKSÜI (NOVEMBER) 24, 2023

₹ 5.00

Asüngnep Dimapur nung lenmang kar khen asoshi shibangtsü

Dimapur, Yimpoksüi/Nov. 23

(TYO): Ao Kaketsir Telungjem Dimapur (AKTD) ajanga Dimapur yimi nung November 25, 2023 anepdang 5:00 ako nungi 8:00 ako tashi "ASEMANG - The Dimapur Marathon" ayongzüka aliba mech i iba Marathon asemitsü aliba lenmang nung tasemertem koda masüba timtem balala nungi kumzüksü aser asema mapang traffic azüoktsü mech i iba lenmang nung shia aliba mapang gari mejajai alitsü, ta Dimapur Police ajanga sangdong ka nung ashi.

Honibarne 5:00 ako nungi 8:00 ako tsüngta tsünglangen agüja aliba lenmangtem nung gari senzüba nokdanga alitsü:

Vehicular restrictions shall be enforced along the following routes -

A. 10 kilometer run: State Stadium (DC Court) - City Tower - Burma Camp (Veterinary point) - Walford - Super Market - Deluxe point - Holy Cross Jn. - City Tower - State Stadium.

B. 21 kilometer run: State

Nagaland nung Nov. 26 nü Constitution Day amungtsü

Dimapur, Yimpoksüi/Nov. 23

(TYO): Linük ajunga den lirumedema Constitution of India yangluba bilemteta Nagaland nunga November 26, 2023 nü Constitution Day amungtsü renema lir.

Pei department nung November 26, 2023 nü sentong ayongzüka agitsü asoshi Administrative Heads of Department (AHOs) ajunga dang totuyuba agütsütsü metedaktsüogo.

Advisor Dr. Yhome-i Secretary, School Education & Literacy ajuru



Dimapur, Yimpoksüi/Nov. 23 (TYO): Advisor, School Education & SCERT, Dr. Kekhrie Yhome-i November 22, 2023 nü Sanjay Kumar, IAS, Secretary of School Education & Literacy, Government of India ajurua liasü.

Hopta ana tejakdang Union Minister of State for Education, Annpurna Devi-i state semdangba sülen 'follow-up' ka ama state aser central lenir ana ya ajurutepa senden mena liasü.

Iba senden nung Dr. Yhome-i education sector nung digital gaps aliba aser ibaji asadang tenzüksü nüngdakba indang Secretory Sanjay Kumar dang shia liasü.

Shisaliok tsütsü tayongzükba balala bentettsü aser tajungba kumdaktsütsü nükjidong nung sensaksema liasü.

Iba mapang 'traditional toys and games' dak rangloker SCERT ajanga züluba kaket ka Sanjay Kumar nem agüja liasü.

Tanep nungi Israel-Hamas rara anena atatsü



Gaza nung Hamas teloki pua aliba nisungtem indang noksa Ramat Gan nung yua alidak November 22, 2023 nü tetsür katি reprangba yangi angur.

Tel Aviv, Yimpoksüi/Nov. 23

(Agencies): Israel den khen atema rara anena atatsü mapang ya Hokulbarne 7:00 ako nungi tenzüksü, ta Hamas teloki ashi.

Anogo pezü asoshi rara ya anena atatsü aser iba mapang Hamas indang Qassam Brigades aser danga "Palestinian factions" temi mitkar inyakyim anena atatsü aser Israel sepaitemia kasaji inyaktsü.

* Anogo pezü rara anena ataba mapang Gaza south tsütsü Israel nunger tayimtsü kata mesenzütsü aser Gaza City anasa aser Gaza north tsütsü

anogoshi anepdang 10:00 ako nungi nikongdang 6:00 ako tashi Israel nunger tayimtsü mesenzütsü atatsü.

* Israel nunger nisung ka chiokba shia Palestine nunger nisung asem chioktsü. Anogo pezü rara anena ataba mapang Israel nunger pua aliba - tetsür aser arishi küm 19 nungi tektubok tanurtem - 50 chioktsü.

* Gaza Stripe ajunga asoshi medical supplies densema anogo nung aid truck 200 tashi Gaza telungi aitdaktsütsü.

* Cooking gas densema anogo nung totzü abenba gari pezü

Gaza-i aitdaktsütsü.

* Hokulbarü Israel nunger nisung 13 chioktsü aser Palestine nunger nisung 39 chioktsü.

* Parnok ya Hokulbar nikongdang 4:00 ako meta chioktsü imlar, aser ajia tang Gaza nung pua alirtem Israel litsü atongba sülen ang Palestine nunger ya chioktsü.

* Tepuodak alirtem ya Megiddo, Damon aser Ofer prisons nungi chioktsü aser parnok ya occupied West Bank nung aliba Beiton checkpoint leni Red Cross ajanga anir aotsü.

China nung pneumonia mesük tashidak pokteta lir

Beijing, Yimpoksüi/Nov. 23

(Agencies): China north tsütsü pneumonia mesük tashidak agi tanurtem shirangtepa indang osang tali tejangjaba World Health Organization-i meshir.

China tesem kar nung tanurtem anepaluba moziuki sünga tanurtem shirangtepa lir, ta non-state media ajanga ashir.

COVID-19 tashidak nokdangtsü asoshi talenba mera balala agüja aliba agienba sülen yimra ama shirangba lir, ta China kettangsür temi ashir.

WHO-i China nung aliba nübertem dang iba tashidak menatepa aoba ajemtsü asoshi mera agitsü ajungshir.

UN health agency ajanga sangdong ka nung ashiba agi, China north tsütsü tanurtem 'undiagnosed pneumonia' agi shirangtepa indang media aser ProMed - global outbreak surveillance system - ajanga sangdongba nung osang tali tejangjaba aginer.

ProMed yagi SARS-CoV-2 indang December 2019 nung sangdonga liasü.

Tepokpok nung 'infection' aser 'inflammation' aliba dang medical tsütsü nungi pneumonia ta ajar. Iba ya virus, bacteria mestüra fungi balala agi adokdaktsütsü akok.

WHO sangdong ya prokshiba sülen sorkar meyong Xinhua news agency ajanga article ka Brehostibarnü adokba nung, tanurtem tango sashiba nung timtem aliba puteta anepalutsü meranger, ta China indang National Health Commission (NHC) kettangsüremi shia liasü.

China aser tashidak menatepa aoba osang dang angashir nisungtemi COVID-19 pandemic bilemteta tsübopper, anungji WHO-i osang tejangja meshiba ya tim dang lir. Ajisüaka Beijing-i telangzüba magütsü tashi iba tashidak pokteta ya memetetsü.

UK indang health security agency(UKHS) ia iba tensa kanga junga asadanger ta shiogo.

October ita nungi China north tsütsü influenza mesüka shirangba osang tali lir, ta WHO ajanga ashi. Linük tesem ajunganle tangola

sashiba nung timtem agütsüba tashidak, talisa influenza, Covid, mycoplasma pneumonia - tanurtem dak kongshiba common bacterial infection - aser respiratory syncytial virus (RSV) tali akumer, ta taoba hopta China indang NHC ajanga shia liasü.

Covid restrictions agienba ajanga item tashidak ya tali akumer ta kettangsür temi ashir.

UK aser US densema danga linüktem nunga pandemic restrictions agienba sülen yimra mesüka shiranger aika liasü.

Tanur aser tesayur aika shirangba ajanga school kar shibang aser COVID-19 tenzükba mapang bilemteta nübertem tsübopper, ta osang kar ajanga shia liasü.

Beijing nungi nisung kati Taiwanese news website FTV News dang ashiba agi, "Tanur aika mozikidang munga lir. Parnok aketba mali aser temang kangshiba balaka mali. Parnok temperature tali akumer aser pulmonary nodules adoker."

Dimapur, Tuensang aser Mokokchung district tem nung VBSY sentong agi

Dimapur, Yimpoksüi/Nov. 23

(TYO): Tang telidak Viksit Bharat Sanklap Yatra nung Tribal locations atema Brehostibarnü Nagaland nung Dimapur, Tuensang aser Mokokchung district kubok yimtsü ti ayimjema liasü.

Dimapur district indang Chümoukedima block nung iba campaign ya Aoyim, Samaguri, Ekyo Yan aser Naga United village nung agia liasü, kong tetsürtem timba sur iba sentong nung dena liasü.

Sorkar kettangsür temi VBSY aser central welfare scheme tem indang rateta shia iba sentong tenzük aser iba sülen EAC Kihomong ajanga 'Hamara Sanklap Viksit Bharat' indang

Iba sentong nung yimtsüng balala nungi Self Help Groups temi temeja ken aser saya balala agi shilem agia liasü.

Drone expert temi drone technology aser aluyimba nung drone amshiba indang yimdklir dang sayua liasü.

Scheme balala nungi teyari angurtemia parnok takum kuli ama agütsü aser sentong nung parnoka tushia liasü.

Iba sentong tembangba sülen Ujjwala aser banking services atema registration aser spot health check-ups agia liasü.

Brehostibarnü Tuensang district nung aliba Chare block kubok Alisopur aser Longkhite

yimtsüngtem nung Visksit Bharat Sanklap Yatra sentong agia liasü.

Iba sentong nung EAC Kihomong, BDO cum BMM B Wakhoo Joorlym Konyak aser Nodal officer BBFCL Aicheng K nungterem dena liasü.

Yimtsüng ana nungi village council chairmen, yimtsüng nung tantsü-tambo, tetsürtem aser nübertem arua iba sentong nung shilem agia liasü.

Mokokchung district nunga iba sentong ya Ongpangkong North block kubok Mokokchung village aser Chuchuyimpang village nung agia liasü.

Iba sentong nung nisung aika arua aden aser sentong balala agia liasü.

Nagaland Folkloric-i SAMVAAD Festival nung shilem agi



Dimapur, Yimpoksüi/November 23 (TYO): TATA Steel Foundation's SAMVAAD Festival (Hornbill Festival Sister Festival Partner) aser Task Force of Music and Arts (TaFMA) na tsüngda 2022 küm tenangzüktepbä yanglua aliba dak ajemdaker Nagaland Folkloric-i, November 18 nü Jamshedpur yimti nung 10buba SAMVAAD Festival 2023 nung shilem agiogo.

Team nung artist 29 densema liasii aser parnoki shilem balala agiba ajanga sentepa aliba lokti jangrademdkja liasü.

Shilem balala agiba rongnung:
- The Nagaland Folkloric

- Alu Yimer (Ao oshi nung nisung anati atenba ken)
- Ama (Earth Dance)
- Wanghe Ongching (Konyak nunger sobaliba ken fusion sur atenba)
- Mungmung (Sangtam oshi nung contemporary Sangtam nunger ken)
- Janjara (Naga nunger spbaliba saisapong balala sayaba sobaliba tsüngsang) aser
- TN Folkloric den Grand Finale densema liasü.

Tang agi tanabenbuba Nagaland nungi artist temi TaFMA tawabangba kubok iba benjung

nung shilem agiogo aser kasa mapang nung SAMVAAD nungi artist temia taküma Hornbill Music Festival 2023 nung shilem agitsü.

Kasa mapang nung TaFMA Project Director Dr. Hovithal Sothu-i, Nagaland nung aliba lanurtem terenlok asoshi aser parnok nüngdak peritsütsü atema Chief Minister Neiphiu Rio-i anir sorkari teti nongita yariba atema kanga pelaba lemsatepa liasü.

Director-isä, state nung artist tem nem maongka tajung agütsüba atema Tata Steel Foundation aser SAMVAAD Festival dang kanga pelaba lemsatepa liasü.

NITI workshop ka ayongzüka agi

Dimapur, Yimpoksüi/November 23 (TYO): Biodata shitak yanglutsü angazükdaktsüsü atema freshers tejangrartem asoshi NITI (Nationalist Institute of Technology & Innovation), Nagaland-i November 23, Brehostibarnü Dimapur Center nung work shop ka ayongzüka katsüogo.

Iba workshop nung LIMPL Founder & Managing Director aser nüngtugu social worker Ajay Sethi shisalen sayur liasü. Temetetsü kaji interview balala atema short list asütsü asoshi Biidata shitak yanglutsüji kanga tongtibang süaka Nagaland nung freshers shilem 75-i Biodata shitak yanglutsü meteta mali.

Sentong nung o jembiba mapang Sethi-i, Resume, CV & Biodata indang tebendang kanga junga rasa ashiba den local, regional & national organization tem nüngdakba indang lemsatep. Paisa, tajangshiba balala angutsü atema peisasa mapang agüja inyaktsü nüngdakba aser lokti sensaksem nung yakyaka shilem agitsü nüngdakba lemsatep.

Candidate ka shimsü asoshi lokti tentet ka tenüngdakba ya kiyimla mesüra kiyimsang

shimba den medemda jembiba mapang Sethi-i NITI nung azüngertem dang lokti tentettem tenüngdakba apir tapet lokti tentet dangi apply asütsü nüngdakba lemsatepa liasü.

Organizations tilatem nung multitasking shilem balala den freshers tem adapt asütsü nüngdakba indang jembiba mapang Sethi-i lokti tentet mashi ka nung tenüngdakbatem indang lemsatepa liasü. Paisa, NITI nung azüngertem dang short term, long term & lifetime nükjidongtem indang shisemba den format shitak amshitsü ajungshia liasü.

Kasa mapang nung NITI-i, Nagaland aser state adena orr organization tajungtiba nung NITI nung azüngertem züngoksemettsü atema interview balala asoshi mock session ayongzüka agitsü. CEO NITI Er. Rishav Sethi-i ashiba agi, recruiting organizations tem takhangba aser nübu tsüngda tawa tulu ka lir aser iba ya süngdaktsüsü asoshi Nagaland nung graduate temi maongka balala agitetsü atema tenüngdakba skill tem angazüksü nüngdaker.

St. Joseph Palliative Care Nagaland Ambassador asütsü Abu Metha shim



Kohima Deputy Commissioner-i metedaktsür

Dimapur, Yimpoksüi/November 23 (TYO): Kohima Deputy Commissioner, Kumar Ramnikant IAS-i sangdong ka ajanga, Kohima jila nung alirtem dang, benjung mapang tonga arur asünung iba ya temulungdang yur gari

senzüsenpong nung kecha tetsükdaktsü madokdaktsüsü atema lenmang tezülen kisüjensüdang amshiba osettem nangdena alibatem November 28 nü tashi nungbo agitsü metedaktsüogo.

Iba tetuyuba sülen manidakra

jelia osang magütsü ketdangsürtem osettsüttem agitsütsü, ta DC-isä metedaktsü.

Kasa sangdong ajangsa, tetuyuba sülen manidakertem temüng ozüng dak ajemdaker merenhsütsü, ta metedaktsüogo.

Child Rights week ayongzüka mungogo



Dimapur, Yimpoksüi/November 23 (TYO): District Child Protection Unit, Dimapur aser Niuland, Chumoukedima aser Dimapur District nung CHILD HELPLINE-i ayongzüka Child Rights dak sendakba nung hopta ka tepeyong campaign ka ayongzüka mungogo.

Linük nung tanga tesemtem den külemi District Child Protection Unit aser CHILD HELPLINE-i ayongzüka November 14 nungi 21 tashi Child Rights week ayongzüka mungogo. Child Rights aser Block/ward aser village Level Child Protection committee constitution dak sendakba nung tangazükba agütsütsü asoshi yimtsüng, block aser ward local bodies tem den iba sentong ayongzüka mungogo.

Child Rights week campaign ya Children's Day nü Prodigals' Home, Dimapur nung aliba tanurtem den munga tenzük, kong team-i tanurtem den sentong balala ayongzüka agi aser iba anogo amungba indang tanurtem den lemsatepa liasü.

Assisi Centre of Integrated Development den longjemer DCPU aser CHILD HELPLINE Unit nati ayongzüka child Rights dak

sendakba nung All Nagaland Domestic workers Union kettangpur aser züngsemtem, Child Rights Movement, SelfHelp Groups aser lokti lenirtem den awareness sentong ka agia liasü.

Sentong nung Women Police station Officer-Incharge Tajungsangla tongti o jembir liasü. Iai women police-i ken o balala agizüka inyaksangshiba indang lemsatepa liasü. Laisa, tanurtem aika cyber crime indang victim akümba indang lemsatep aser iba dak sendakba nung tsürapurtem kanga kümküma alitsü koda tongtibang iba indang lemsatep.

Kasa mapang nung team-i CHILD HELPLINE 1098, Child Rights, District Child Protection Unit indang Services balala dak sendakba nung session balala ayongzüka agi.

Maneni Child Rights aser village Child Protection Committee (VLCP) Constitution dak sendakba nung lokti tentet balala aser Niuland District kubok school balala nungi lenirtem den awareness sentong ka ayongzüka agiogo. Sentong nung District child Protection officer, Dimapur

Avika Zhimomi-i, Village/ward/ block level Child protection Committee indang shilem aser khuret indang lemsatepa liasü. Paisa, tanurtem kümzüka toktsütsü atema team den longjemer inyaktsü asoshi yimtsüng lenirtem dang mepeshia liasü. Maneni Project Coordinator CHILD HELPLINE Alomi Sumi-i, Child Rights aser CHILD HELPLINE 1098 Services indang lemsatepa liasü. Ano Legal cum Probation officer, DCPU Moajungla-i POCSO Act indang jembia liasü.

DCPU aser CHILD HELPLINE Unit-isa November 21 nü village local bodies, Asha workers, Angwadi aser Seithekema 'B' Basa aser Singrijan yimtsüng kubok school balala nungi lenirtem den village child protection committee constitution dak sendakba nung awareness sentong ka ayongzüka agiogo. Sentong nung PO(NIC) DCPU Esther Sumi-i VLCP Khuret indang lemsatepa liasü. Maneni yimtsüng nung lokti tentet balala nem CHILD HELPLINE Service aser District child protection unit indang tangazükba agüja liasü.

Nagaland nung education aser healthcare dak sendakba nung Catholic community-i tongtibang shilem agiba indang jembiba mapang Metha-i, Naga nungertem dang parnok mapa tajung asoshi tenüngsang agütsütsü ayongzüka liasü. Paisa, lanuwa Little Flower School Kohima nung azüngba

bilemetshia jembia aser pa taküm arangtetba nung iba institution-i tongtibang shilem agiba indang lemsatep. Paisa, Naga nunger takok tajung ngua aoba jala jabasotem aika Catholic Institution tem nungi lir, ta ashi.

Kohima Bihop aser St. Joseph Pain & Palliative Care Centre tir Rev. Dr. James Thoppil-i, iba care center ya multidisciplinary medical specialty centre ka ta ashi aser iba ya tashidak tamajung agi tonger aliba nüburtem taküm libaliro jenjang ajungkettsütsü asoshi lir, ta shisem.

St. Joseph Palliative Care Centre ya Chief Minister Neiphiu Rio-i, 2022 küm April 24 nü lapokja liasü, koba Italian Bishops Conference aser local teyari balala ajanga yangluba lir.

Iba centre ya comprehensive inpatient care, home care, yareta shiranger kinungertem atema training agütsütsü, primary caregiver tem skill arangtetshidaktsüsü aser awareness balala agütsütsü asoshi lir.

Rajasthan nung assembly election atema nüboyim tembangogo



November 23, 2023 nü Jaipur nung aliba Congress headquarters nung osangbenertem senden ka nung Rajasthan Chief Minister Ashok Gehlot, AICC in-charge of Rajasthan Sukhjinder Singh Randhawa aser Congress lenir Pawan Khera nunger tangokba noksa nung angur.

Jaipur, Yimpoksüi/November 23 (Agencies): Rajasthan assembly election atema party balalai nüboyimba sentong tembangogo aser November 25 nü election agitsü.

Rajasthan nung ruling Congress-i Ashok Gehlot-i aniba sorkari inyaktetba mapatem aser schemes nung ajemdaker nüboyimba den külemi tenangzükba onük tenet sangdong.

Ano külén opposition BJP-i state nung tetsürtem anema inyakba, ochimashi aser tatiang question paper leak asüba nung ajemdaker Congress aija liasü.

Rajasthan nung assembly menden ajak senteper 200 lir, ajisüaka menden 199 atema dang election agitsü, kechiyong Sriganganagar kübok Karanpur menden nungi Congress candidate, Gurmeet Singh Konoor ajungbena süadok.

State nung assembly

constituency 199 nungji voters ajak senteper 5,25,38,105 lir.

Congress Tir, Mallikarjun Kharge den party lenirtem- Rahul Gandhi, Priyanka Gandhi, Ashok Gehlot aser tangartemi lokti senden aika nung jembia party atema nübo yimogo.

Ano külén Ato kilonser, Narendra Modi leniba nung BJP lenirtemi lokti senden aika ayongzükka party candidate tem atema nübo yimogo.

Modi-i Bikaner aser Jaipur nungbo road show nunga shilem agi. BJP Tir JP Nadda, Union minister tem- Amit Shah, Smriti Irani aser Rajnath Singh nunger den Chief minister tem- Yogi Adityanath (Uttar Pradesh), Shivraj Singh Chouhan (Madhya Pradesh) aser Himanta Biswa Sarma (Assam) nungeria constituency aika nung lokti senden ayongzükka party candidates atema nübo yimtsüogu.

Election department nungi

ketdangser kati, election atema nüboyimba nikongdang 6:00 ako nung temabangogo; Honibarne 7:00 ako nungi nikongdang 6:00 ako tashi election agitsü aser December 3 nü vote azüngtsü, ta metedaktsü.

Election temzüng kübok joko state nung lokti senden, road show mesüra television ajanga nüboyimba dak sendakba sentong kecha magitsü.

Brihostibarnü Chief electoral officer, Praveen Gupta-i, nisung kari danga item temzüng alema inyakra küm ana tashi tepukdak ayutsü mesüra senchi achitsü, mesüra temerenshi anaprongla agütsütsü, ta metedaktsü.

Election Commission-i sangdong ka ajanga, election nüboyim tembangba sülenbo constituency nung voter masüba mesüra candidate masüba, mesüra MP aser MLA shinga iba constituency nungji alitsü makok, ta metedaktsüogu.

and Growth for All in the Region ajanga ibaji tajungba kümdaktsü. Minister Radegonde-i semdangba ajanga linük ana tsüngda tesendaktep tashi itsitsü," ta MEA sangdong ajangasa metedaktsü.

"Tang mezüng Foreign Minister ka ama India semdanger FM Sylvestre Radegonde New Delhi tonga arudang pa pelaa agizüker. Linük ana tsüngda tesendaktep tajungba akümtsü atema o lemteptsü," ta Bagchi-i X ajanga metedaktsü.

1976 küm Seychelles nüchiso anguba sülen India aser Seychelles na tsüngda tesendaktep yangluia liasü.

"India aser Seychelles na tsüngda tesendaktep junga lir aser Ato kilonser (Modi) mangdang- 'SAGAR' - Security

2020 küm tenzükba 'Mission Sagar' ya Coronavirus wara mapang Indian Ocean Region nung aliba linüktem nem Covid dak sendakba teyari agütsütsü atema India-i tenzükba mapatong ka lir, ta MEA-isa metedaktsü.

Sagar Mission kübok India-i INS Kesari rong ajanga Maldives, Mauritius, Madagascar, Comoros aser Seychelles nem covid dak sendakba teyari balala agüja liasü.

Kolkata nung aliba Netaji Indoor Stadium nung TMC party nung inyakertem den jembidang Mamata-i, ken o balala nung party lenirtem apuba sülen party MP, Mahua Moitra-a anentsütsü atema kari asalentong yanglular, ajisüaka election jakdang iba ya ajanga lai tajangzük dang angutsü, ta ashi.

J&K kübok Rajouri nung kiralongrar den raradang sepai 5 süogo

Srinagar, Yimpoksüi/November 23 (Agencies):

Bodhbar aonung nungi tenzükä Brihostibar tashi Jammu & Kashmir kübok Rajouri nung kiralongrartem den khatepdang Indian Army pongu süogo.

Brihostibar nep yakta Rajouri kübok Baji Maal area nung sepaitem aser kiralongrartem tsüngda khatep tenzükä liasü. Parnok tsüngda raradang captain rank sepai ana densema sepa pongu süogo; kasa rara nung kiralongrartema ana süogo.

Kiralongrara rongnungji kabao Afghanistan nung tamalen training agir Lashkar-e-Taiba (LeT) commander ka densema lir, ta ketdangsertemi metedaktsü.



November 23, 2023 nü Jharkhand nung West Singhbhum kübok arem ka nung Maoists telungpurtemi IED bomb ka pokdaktsüba lendong nung yirur CRPF sepai ka helicopter ajanga anir aruba sülen hospital-i anir aodang tangokba noksa nung angur.

Centre nung tang aliba sorkar ya joko ita asem dang alitsü: Mamata

Kolkata, November 23 (Agencies):

Brihostibarnü Trinamool Congress tongti lenirtem aser West Bengal Chief Minister, Mamata Banerjee-i, tang Centre nung aliba sorkar ya joko ita asem dang alitsü, anungji tang opposition lenirtem anema inyakba central agency tem yagi 2024 küm Lok Sabha election sülenbo BJP anema inyaktsü, ta ashi.

Kolkata nung aliba Netaji Indoor Stadium nung TMC party nung inyakertem den jembidang Mamata-i, ken o balala nung party lenirtem apuba sülen party MP, Mahua Moitra-a anentsütsü atema kari asalentong yanglular, ajisüaka election jakdang iba ya ajanga lai tajangzük dang angutsü, ta ashi.

"Tang opposition lenirtem anema inyakba Central agency temi 2024 küm Lok Sabha election sülenbo BJP lenirtem anema inyaktsü," ta lai ashi. "Tang Centre nung aliba sorkar ya joko ita

Jammu & Kashmir Army aser Police senteper kiralongrartem den maneni radar.

"Security sepaitem telok kati Rajouri kübok Baji Maal arem nung kiralongrartem mita aoba mapang nung kiralongrartem ajuruba sülen khatep tenzük," ta ketdangsertemi metedaktsü.

Taküm January ita nungi tenzükä Rajouri, Poonch aser anasa aliba Reasi district tem nung kiralongra dak sendakba nung nisung 546 süogo. Rajouri nung kiralongrartem tenet aser sepa 9 densema nisung 23 süogo; Poonch district nung kiralongrartem 15 aser sepa pongu asü aser Reasi district nung kiralongrartem asem khaset.

Seychelles Foreign Minister-i India semdanger

New Delhi, November 23 (Agencies): Seychelles Minister for Foreign Affairs & Tourism, Louis Sylvestre Radegonde-i anogo ananü atema India semdanga New Delhi tonga aruogo.

Seychelles Foreign Minister akümba sülen tang mezüng Radegonde-i India semdangba mapang pai External Affairs Minister S Jaishankar ajurua senden amentsü aser linük ana tsüngda lenla balala nung tesendaktep reprangshitsü, ta Ministry of External Affairs (MEA)-i metedaktsü.

Seychelles Foreign Minister agizüka Ministry of External Affairs otongdar, Arindam

Bagchi-i, linük ana tsüngda tesendaktep jenjang tajungba akümtsü atema o lemteptsü, ta metedaktsü.

"Tang mezüng Foreign Minister ka ama India semdanger FM Sylvestre Radegonde New Delhi tonga arudang pa pelaa agizüker. Linük ana tsüngda tesendaktep tajungba akümtsü atema o lemteptsü," ta Bagchi-i X ajanga metedaktsü.

1976 küm Seychelles nüchiso anguba sülen India aser Seychelles na tsüngda tesendaktep yangluia liasü.

"India aser Seychelles na tsüngda tesendaktep junga lir aser Ato kilonser (Modi) mangdang- 'SAGAR' - Security

and Growth for All in the Region ajanga ibaji tajungba kümdaktsü. Minister Radegonde-i semdangba ajanga linük ana tsüngda tesendaktep tashi itsitsü," ta MEA sangdong ajangasa metedaktsü.

2020 küm tenzükba 'Mission Sagar' ya Coronavirus wara mapang Indian Ocean Region nung aliba linüktem nem Covid dak sendakba teyari agütsütsü atema India-i tenzükba mapatong ka lir, ta MEA-isa metedaktsü.

Sagar Mission kübok India-i INS Kesari rong ajanga Maldives, Mauritius, Madagascar, Comoros aser Seychelles nem covid dak sendakba teyari balala agüja liasü.

Mamata Banerjee-isa, BJP-i aniba sorkari reservations ya agienadokner, ajisüaka lai ibaji anema nokdaktsü, ta ashi.

"Minorities nem reservation agütsüba anema BJP-i nokdaker, ajisüaka onoki itemji OBC quota ajanga benoktsü," ta lai metedaktsü.

Banerjee-isa, linük ya "saffron" kümdaktsütsü atema inyaker, metro railway stations nungi tenzükä Indian cricket team tashi nung iba sentsü (temeremo) amshir, ta ashi.

BJP lenirtem aitsüba olen ka nung Mamata-i, "Cricket World Cup final asaya Ahmedabad nung masü saka Kolkata mesüra Mumbai nung asaya asübo India-i takok ngur lila. Parnoki World Cup mapang asaya ajak koka aru, ajisüaka temen menartem adenba asaya nungbo parnoki tamakok angu," ta ashi.

Laisa, West Bengal ya investment atema tongtibang tesem ka kümdar; IT company tulu aikati Kolkata nung aliba 'Silicon Valley' project nung invest asür, ta metedaktsü.

SAINIK SCHOOL PUNGLWA, NAGALAND

(Under the Ministry of Defence)

Admission Open for Classes VI & IX - 2024

Online Registration Open

All India Sainik Schools Entrance Examination (AISSEE)-2024



Admission to Classes VI & IX is on the basis of an All India Sainik Schools Entrance Examination (AISSEE), for the academic year 2024-25. Online registration for admission to Sainik Schools has begun from **07 Nov 2023**. Last Date is **16 DEC 2023**. Correction of details filled in application on Website is from **18 to 22 DEC 2023**.

Date of Examination is **21 Jan 2024 (SUNDAY)**. The designated centres in Nagaland are Dimapur, Kohima, Mon, Tuensang and Sainik School Punglwa Campus. All information regarding the same is available at School website <https://sainikschoollpunglwa.nic.in> and also at NTA website <https://aissee.nta.nic.in>.

Approximate Fee Structure for Academic Session 2024-25 is ₹1,49,229/- (for SC/ST) & ₹1,50,729/- (for Gen/OBC). State Govt. of Nagaland pays approx ₹ 50,000/- scholarship annually to the Cadets.



TIR YIMYIM

YIMOBILEM (EDITORIAL)

DIMAPUR ROGONÜ, YIMPOKSÜI (YIMPOKSÜI) 24, 2023

Ano Gokhale aika nüngdaker

Cakhesang lima nung Kutsapo yim ya nüngtugu yimtsüng ka lir. Iba yimtak nungiang tang Nagaland nung yimtsüng shia Village Development Board (VDB) tenteta aliba ya tenzük. Atangji, iba shisatsü ya Kutsapo nungertem dak nungi apokba shisatsü ka masü saka ibai küm 47 shi jakdang government nung ketdangser ka tenüng agi A.M.Gokhale, Phek nung Deputy Commissioner asuba mapang pai parnok yimten lenir Vamuzo nungertem den jembia yimtaklirtem nem pei yimtsüng atema inyakba terenlok mapatem nung kibur kümdakja inyakdakstsü atema apiteta sentong ka liasü. Aji oda, iba mapang Gokhale-i yimtaklirtem dang ashiba ama, pei yimtak nüngdakba terenlok mapa inyakstsü asoshi yimtaklirtem government bushia aotsüba masü, mesura government dang asüngdangstsüba masü saka government ang yim tonga arutsü aser yimtaklirtemiang parnok atema nüngdakba terenlok mapatem reprangteta inyakstsü ta asüba tangatetba nung VDB ya Nagaland nung tenzükogo. Aji oda, tangbo yimtsüng shia nung terenlok mapa inyakstsü atema yimtak malir government nung ketdangser kati sentong yanglutsür masü saka yimtaklirtemiang parnoksasa pei yimtak pei nüngdakba terenlok mapa inyakstsü atema telemtetba agir. Ibajji yim tonga government aruba tamaitsü lir. Ibajiang, peisasa pei yimtsüng aser nübor tem asoshi yimsüba yimten, local self government, lir. Ibayongji, tanübo Nagaland nung terenlok mapa inyakbaren nung town-tem dang nungibo yimtsüngtemang tajungba aser temerükba angur. Aji oda, yimtak yimtsüng nung yimtaklirtem asoshi terenlok mapa inyakstsü atema yimtaklirtem mulung, kecha balaka government nung tekalen nungi temelaba ka menüngdaker. Joko, tanübo state government-i sen dang yoktsü aser terenlok mapatembo yimtsüng government-i pei yimtsüng asoshi sentong yangluainyakstsü, anungji VDB tajung sura yimtsüng topur junga angutsü aser VDB mejungra yimtsüng majungtsü. Iba lagi Nagaland nung VDB tenzükba shisatsü ya tulu, terajem aser yimtsüngtem nung terenlok mapa shitakshitak inyaka aotsüba lenmang shitak ka sapokba liasü ta, ano, tangang tajungba angateter. Iba amaji nübor tem asoshi shisatsü tasen bener arua tenzükda ktsü bajiang shitakba lenir lir. Aji oda, Kutsapo nungertem dang masü saka Nagaland nung alir Naga nunger yimtsüngtem ajaki VDB alitsü apitetsang aser tenzüktsü sang A.M.Gokhale nem konang tetushi agütsütsü langa lir. Kutsapo nungertem pa nem dang masü saka pa dak nungi jakzükba semchirsemurtem ajak nem Kutsapo senso temeten agütsüba jai pa dang kanga pelaba tamaitsü dang masü saka pa sülen shirnoksa Nagaland government kubok ketdangsüba maparen balala nung inyakdir, parnok asoshia pa amaji nübor tem atema shisa tasen bener arua inyakdakstsüna ajungshiba mapa ka asütsü. Atangji, nübor tem asoshi mapa tajung inyakstsüka, Naga nunger masüba ka nem Kutsapo nunger asütsüsa temeten agütsüba lagi, shitakba nung, Naga nunger kümtettsü asü masüar meshitettsü, kechiyong Nagaland nung tanü tashi Naga nunger masüba nisung Naga nunger akümtsü atema latetba ozüng aser inyakyim kecha mali. Ajisüaka, Gokhale'er kinungertem asoshi aji tongtibang masü saka Kutsapo nungertem pa tenüng tajung mesamadakstsü alima nung tushia amshibaji asütsü. Iba lagi pa tanü taküm meliaka ali ama nübor tem rongnung bilemtedakstsü. Aji oda, tanüa Nagaland renloktsü atema government ketdangsertem rongnung Gokhale aika nüngdaker. Nagaland ya alushia aser nisungtem sobalibaa India nung tanga state-tem ama masü, anungji la asoshibo inyakyim sentong balaka nüngdaker. Itemji reprangteta inyakstsü Gokhale ama government nung ketdangsertem inyakstsü. Government nung ketdangsertem tangari ashiba kisüng angaa, yes sir, yes sir ta taküm piyong alitsüba masü saka 'asen lima aser asen nübor tem asoshibo yamai inyakang tajungba asütsü, sir' ta yimten lenir tem den shisa tasen apiteta lemsateptetba ketdangser kaka asütsüla. Idangji ang asen lima tajung kuma melenshiba asenoki angutsü.

OLEMSABANG

YASHE TANÜ ASER TETI KASA TANG

~ Süpongünsang Longkümer,
Darogapathar Dimapur

Asenoki mapang ajak nung bei sasa alir ama bilemer saka aser kümtetdakba Khrista Yisu tamangba tsütsü tang ama bilemer, saka Lipok otsü nung Pa kibur, yimten yimli nung, subaliba nung, tamang lenmang nung, Rongsen lenmang nung Pa kibur Tsüngrem lira aser Pa yashe tanü aser teti kasa kodanga memelenshiba tiyanglur Tsüngrem lir.

Tir yimyim yim o bitem nung tekülem yimya melenshitsüla ta züngsheba dak ajemdaker kù tebilemba kar lemsatepber. Idangyongji tanur tepo lagi nüktü yima ayimdena asüngtang, "Ni amanger nai ni mamangba asoshi yariangma." Kodang Yisui telok ka asema aruya aliba angu Pai temenen tanülaji arütsü, aser ashi " Na suwar aser tenarong tajak tanüla, Ni nü tang ashir, pa dak nungi adokang aser kodanga pa daki tei." Pai asaten aser kanga atepdena aitdaktsür adok, aser tanurji tasü ama aküm, anungji aikati pa süogo ta bitem, saka Yisui pa teka nung amer atsümesu aser pai nokdak. Yisui kodang ki kati aru pa nütsüngtemi kibok nung pa tang asüngtang, "kechiba onoki aji maridoktet?" Yisui parnok dang ashi " yamalaipo sarasatem dak alema kecha agia maridoktetter. Mark 9 : 24-29 Tanur dak inyakba Mojingji Yisui meteta lir yamaji Mojingji-a Yisui metet aser kanga tsüpür, saka tetsüngta nung tanurji kanga kangshi, tanur jagipo Yisui-a memetet aser Mojingji-a memetet, saka Ochibai tanur ajanga Pa jongkai adoktsü asoshi Mojingji-arütsü aser tanurji nüji kümdakstsü, aser ochibaji (YSIS) chijia akizüka amang. Ao lima aser Naga limai osang tajung arule nungi otsüla obuola, aser tsürapor ajaki ochibai jembiba akizüka nüji aküm aser ochiba dak amanga külema arur. Parnok mapang Sannükertem aser sayutsüngirtem temeshi tanüla agi sünga Tsüngrem tenzükba Naga Lima khrista asoshi ta ayimoktsüba ya kuli lir. Parnoki Bothbar sentep aser honibar sentep bible study yimya nung akia mapang agi melake jangratema angazükba Pastor aser sayusüngirtem temeshi tanüla agi sünga aliba ajanga ajak amangsepaktsübaj parnok asoshi taküm kuli agütsür. Laishibai yamai ashir, Nisung chir Israel Sanükertem anema shiang ; shina jembiang aser parnok dang shiang, yamai kibuba Tsüngremi ashir bei dang mesüba Israel Sannükertem asoshi ayatai! Sannükertem Santem memesütsü no? Nenoki tashe maitbatem tashe meitdaktsü mesura shiranger maneptsü, mesura mashilene aor meyipba anir maru, mesura tesamaba mepushi: Tashiyim aser tesashi agi parnok madak yimsü asü Parnok prokshia ao kechaser Sannükter mali asü Eze 34 : 2-6. Tekülem melenshitsüla ta asübaji-a tajung saka tekülem melongsu, sentepi tarur mali ta asübaji santem tashe mait, mesura tai masü, Sannükter tashe mait ta yakta angatet nungpo tekülemji memelenshi yonga tajung asütsü. Sannükter memelenshira tekülem melenshi yonga tekülemerji melongsutsü. Kechiba Santem prokshia aor. Khen mapang asangur ka amongnü süngtong kati süngjang achitsü atu saka süngtong nungi malutet kanga shisa pulua asatena alitang azüksepber ka tua asangubaji ponger tanem tanemi alua ali tongtsü. Iba otsü lagi amongnü arem nung mejajadakstsü Pastorbai air asangur ayongzük Iba sülen nungi asangubaji tekülemi khen tanga marue taküm temdakstsüba ama temeshi sabang nungi kijen ojen mejembi tajungba ta angateter. Tekülemi marurtemji pushia anitena tanüla chiyongtsü magütsüra arogo samatsü menua mali. Sannükertem samaba, mesura tashe maitba tanülatem atsüa arutsüa spiritual sermon anganüra mapang talangka aoyongbo mesenshinüe menpetta amenür, intellectual topic agi tekülem nungpo meinpronger iba tekülemji tatsüka agi talangka ama laktetter, kechaser temeshi tanüla leniba melira tekülemji amajok, iba ama lagi lanur nem tanüla chiyongtsü shidak magütsür. Anungji parnok dak taremkü milira Dimapur nung parnok jenokdak aika lir saka Parnok jenokba arogoji mamanger limburtem temulung meyipdakja anitenba sürapang Tsüngremi pelatsü, saka arogotem nungi anizükba tang süra iba arogobia rakzükra temba mesük tang asütsü.. Iba ama lagi tanüla nung tzüraseta jajar aika ashiokstsütsü mapang tonga aruogo. Laishibai ashir temenenbur ten süngre taputep yamaji temeshibur shia aru dang temenenbur shia marutsü. Küm meyi kaji mapensa tashi tasürtem shia marutsü (Temenenbur atema ashir) Yisü maru dang raratepba ya Gog aser Magog rara masü Tena rarabaji-a Küm meyi kaji tembang dang ataloktsü JA 20: 7 nung jangja angutsü anungji Sayusüngiba osang kümtanga akizükti ta lemsatepber.

Iba Olemsabang nung lemsaba ken-o aser shisatsü ya iba ocet züldü
bilemba ken-o ama tazüngeri angateta agitsü mepishir

Yisu Khrista atema kulisürtem asütsüla: Rev. Dr. Vevoso Khamo



Rüzhükri GHSS Ground, Kohima nung Kohima Bible College (KBC) pur Golden Jubilee Celebration tanünübuba sentong nung choir-i ken atendang tangokba noksa nung angur.

Kohima, Yimpoksüi/ November 23 (TYO): Bodhbarnü Rüzhükri GHSS Ground, Kohima nung Kohima Bible College (KBC) Golden Jubilee Celebration tanünübuba sentong nung tongti o jembirji Nagaland Christian Revival Church tatong Tir, Rev. Dr. Vevoso Khamo liasü.

Jubilee sentong nung jembidang Rev. Khamo-i, Jubilee ya pelaa agizüksüla, kechiyong iba ama mapang ajuruba ya temoatsü mapang lir; Jubilee küm ya nüchi anguba küm, tai toktepa aser talenba

nung alirtem kümzüksü atema sayutsüngiba küm lir, ta ashi.

Paisa Jubilee nung adenertem dang Khrista atema kulisür kaka asütsü aser kin ajak dangi oa Khrista osangtajung prokba nung shilem agitsü ayongzük.

Sentong tetenzüklen Council of Rengma Baptist Church (CRBC) Executive Secretary, Haiwalo Apon-i Jubilee salem osang lemsatepa liasü.

Iba sentong ya taoba mapang KBC nung azünger, Surjay B. Sapkota leniba nung agi.

Koinonia Baptist Church-i

sentong tenzüka tekülem aser tetushi ania liasü aser Rokovituo Chüchad den Koinonia Baptist Church choir aser Konyak Baptist Church Kohima-i ken aten.

Kasa sentong nung Phezoucha Nagamese Baptist Church Kohima nung pastor, Rev. Velavoyi Keyho leniba nung sarasadem agia liasü.

November 23 nikongdang sentong 4:00 ako nungi tenzük aser iba sentong nung tongti o jembirji Life Transforming Ministries tentetsang aser Tir, Rev Dr. Putsato Naleo liasü.

Uganda nung o entepba sülen Khristan ana dak mejungi azük

Nairobi (Kenya), November 23 (Agencies): Anüdoklen Uganda linük nung sentong ka nung Muslim nungerem aser Khristantem tsüngda Khristan yimsü aser Islam yimsü indang o entepba sülen Muslim nungerem aser Khristan ana dak mejungi azük.

Arrshi küm 32, Musa Kirongosa aser Swidiki Buyinza (27) na ya Nawaikoke, Kaliro District nung aliba Arogo ka nungi lir. November 13, 2023 aonung Bulumba jila nung Muslim nungerem ayongzükba Khristan-Muslim o entepba sentong nungji Khristan ana-Musa aser Buyinza nati tama jembia liasü.

Laishiba aser Koran

naprongla amshia tenati, Muhammad ya taila ainkar lir, ochiji Yisu Khrista dak dang angutsü aser meimchirtem kümzüksangji Yisu dang lir, ta ashi.

Khristan ana o metembangdanyongi Muslim nungerem tejashi nung tena anema apuso, ibayongji tena jena oa Khristan ki ka nung jenok.

Iba sülen Muslim nungerem kari gari lenmang nokdangba sülen ghonda ana shi lir aonung 7:00 ako meta Khristan anaji kidangi apusoa liasü.

Osangbener den jembidang Buyinza-i, "Aonung 7:30 ako meta kümna motorcycle nung apusoba sülen kilometer ishika

amanger, Buruhan Musobya den Muslim nunger troki künä nokdang. Parnoki 'Allahu Akbar' ta ayimdena motorcycle raksatsüba sülen Laishiba shisatsü," ta metedaktsü.

"Iba sülen parnoki künä dak azük aser Musa bo tetsüng-a sükdang. Taxi ka aruba mapang nung ang parnok jena ao. Taxi nungji Kaliro jila nung pastor den Khristan kar liasü, aser parnoki künä hospital-i anir ao," ta paisa metedaktsü.

Buyinza-i pabo hospital nung anogo ka dang among saka Musa Kirongosa bo anogo pongunu among, ta metedaktsü.

Arogo lenirtemi iba tatalokba anema ken o ka benokogo.

Yirusalem nung Arogo lenirtemi tezüngzüktep ka anema nokdaker

November 23, 2023: Yirusalem nung ali tezüngzüktep ka agiba ajanga Yirusalem yimi tejenba nung akhidang nungi aliba Armenia nunger Khristantem samatsüa akok, ta bilema Yirusalem nung Arogo balala nungi lenirtemi iba tezüngzüktep anema nokdaker.

Yirusalem nung Armenian district shilem 25 shibo hotel tuluka yanglutsü atema developers nem agütsütsü asoshi tezüngzüktep agi.

Greek Orthodox aser Roman Catholic densema Yirusalem nung aliba Arrogotem nung tongti lenirtemi külem sangdong ka ajanga, iba

tezüngzüktep agibaji ajanga Yirusalem nung Khristantem kongshitsüa akok, ta metedaktsü.

"Developers-i asalentong yangluba ajanga iba tesem nung Armenia nunger Khristantem samatsüa akok aser temeshi lima nung Khristantem jenjang tashi meiti akümüsü," ta parnokisa metedaktsü.

2021 küm July ita nung Yirusalem nung Armenian Arogo nung tongti leniri iba tezüngzüktepji agia liasü, ajisüaka taküm survey agirtem aruba mapang nung ang Arogo züngsemtemibö ibaji meteta liasü.

Armenian Arogo nung

tongti leniri jagi, pa dang yazu jembia liasü, ibayongji pai iba tezüngzüktep thitsütsü atema 'legal' tsütsülen nungi inyakdar, ta metedaktsü.

Ali contract tezüngzüktepji küm 99 atema lir aser terenlok mapa inyaktsü atema aliji tang aliba car park dang masü saka ali jagi community hall, Arogo leniri meyong atsü, seminary

ka aser ki pongu amshir, ta osang ka ajanga metedaktsü. Armenia ya 301 küm Khristan yimsü agizükba mezüngbuba linük lir, anungji Yirusalem nung aliba Khristantem meyong temeshi tesemtem indang temedenji parnok atema-a kasa lir.

ANOGO ABEN TSÜNGREM DEN

Tesendaktep

1 Tesa. 4: 1-8

ATSÜABUNG MEDEMBA - KHRISTAN TANGATETBA

Aser tena prongla mangsa liasü, nisung o pa kinüngtsü na, aser maktep iiasü. Lipok 2:25.


Laishiba nung iba o jakdaka dang ashiba jagi Tsüngremi atsü-abung medembaji Tsüngremi saklokba mapa ta sayur. Pai ibaji yanglu. Idakji kecha tamajung mali. Adam aser Eva mangsa liasü saka kecha maktep iiasü. Temenen malidanga, atsü-abung medembaji liasü. Tsüngremia ibaji junger ta ashi. Ibai taaktsü o ka masü.

Ano item O yagi satitsü atema Tsüngremi atsü-abung medembaji yanglu ta sayur. "Anungji nisungi pei tebu aser pei tetsü toktsür, pei kinüngtsü den sentepa alitsü; aser tena shi ka dang alitsü" (Lipok 2:24). Iba telungjem nem Teyanglur -Tsüngremi ozüng aser temoatsü agütsü. "Aser Tsüngremi parnok moatsü aser Tsüngremi parnok dang ashi, "Soyapokyang, aser jenti renang, aser alima sündakja aji azüokang" (Lipok 1:28).

Atsü-abung medembaji sempet ajanga Tsüngremi meimchir taküm tasen yanglutsü agütsü. Satiba kübok tepela aser jangratema shilem agitsü Teyangluri Pa shisatsü nung iba nüngdak ya yanglu. Asenok temenen nung tsükba ajanga atsü-abung medembaji menena kümduktsü. Saka asenoki Pa sempet tajung mejungi amshiba temenen asoshia Yisu kangki nung asü.

Temeim Kibur, onok tebur aser tetsür yangluba asoshi Ne tenüng asanger. Iba atsü-abung medembaji senti sempet Nai mulungba nung amshitsü onok dang yariang; Yisu tenüng nung. Amen.

New Wine tentetsang, David Pytches alima nungi pilaogo



David Pytches aser pa kinüngtsü, Mary

November 23, 2023: New

Wine tentetsang, putir David Pytches Mongolbar aonung (November 21) alima nungi pilaogo; pa mapang talangka shiranga liasü, ta New Wine sangdong ka ajanga metedaktsü.

1989 küm David Pytches-i pa kinüngtsü Mary den senteper New Wine tenzüka liasü, aser tangbo iba ya Evangelical church network tuluka kümogo.

Tang New Wine nung tongti lenir, Rich Johnson-i, "Arogotem nem tanela temeshi tashi ajangshidaktsütsü atema David aser pa kinüngtsü nati 1989 küm New Wine tenzükba atema onoki tena dang kanga pelar," ta metedaktsü.

Taoba mapang New Wine nung lenirtem- John aser Anne Coles natia David Pytches nem akhüm tetushi agütsüogo.

John aser Anne nati, "Pai (David) Yisu aser Laishiba kanga meima liasü, pai pa meshiteta alitsü atema inyak, pai maneni sarasadem, pai pa meyong ajak agütsütsü melunga liasü, aser ibaji ajanga Tsüngremi pa kanga moatsü," ta metedaktsü.

"Pai ajemalua aser temeim agi tasü itta Arogo ani aser tanela temeshi tashi nung mission inyak. Ibaji ajanga par Arogo nung temelensi adokba dang masü saka alima tesem balala nung Arogo lenirtem aser Arogotem atema tatishtü tajung ka aküm," ta tenatisa metedaktsü.

AO OSHI ANGAZÜKDAK:
TANÜ ANGAZÜKTSÜBA OJANG
**Sen**


(n) kechisarina alitsü aser melentsü akokba oset (currency, money)

* Tanü asüng osettsüset ajak nung sen jenjang tasak kümogo.

Sena

(v) külemi ka sülen ka ta aoba (walk in line)

* Aener telok ka ozü kiyong sena ao.

OLONG PAITEP # 6623**TIPLÉN**

- | | | | |
|--------------------------|-----|--------------------------------|-----|
| 1. Ojembitsü tashi | - 8 | 1. Tepok telung nung shilem ka | - 7 |
| 5. Süngjang tapu ka | - 5 | 2. Tamajung aküm | - 5 |
| 7. Tekanük nung enokba | - 5 | 3. Chi den külemi achiba | - 3 |
| 8. Teka amtep | - 5 | 4. Meimchir alimai aruba | - 3 |
| 12. Tzük asendak | - 5 | 6. Laishiba nung ayong ka | - 4 |
| 14. Tsüngpang tema aliba | - 5 | 9. Tarutsü nükla | - 7 |
| 15. Ken atenba yimya | - 5 | 10. Tamendakdak/Nükjidong | - 4 |
| 16. Asangur | - 8 | 11. Tenük-telen mejungi aküm | - 5 |
| | | 13. Terok nungi adokba | - 3 |
| | | 14. Meimchir telemza | - 3 |

LANGTSÜNGLEN

- | | |
|--------------------------------|-----|
| 1. Tepok telung nung shilem ka | - 7 |
| 2. Tamajung aküm | - 5 |
| 3. Chi den külemi achiba | - 3 |
| 4. Meimchir alimai aruba | - 3 |
| 6. Laishiba nung ayong ka | - 4 |
| 9. Tarutsü nükla | - 7 |
| 10. Tamendakdak/Nükjidong | - 4 |
| 11. Tenük-telen mejungi aküm | - 5 |
| 13. Terok nungi adokba | - 3 |
| 14. Meimchir telemza | - 3 |

OLONG PAITEP # 6622 TELANGZÜBA**TIPLÉN :**

1. Mamang 6. Asa 9. Ajaso
10. Anak 11. Jinak 12. Na
14. Langtem (Lang) 16. Meseni
19. Ina 20. Jetsa 22. Maka
24. Korua 26. Akora 28. Marok
29. Atsu

LANGTSÜNGLEN :

1. Majemi 2. Aji 3. Mangsa 4. Asa
5. Nokbang 6. An 7. Sang 8. Aka
10. Aya 14. Lijak 15. Neter
17. Entaka 18. Mamazü 21. Saro
22. Mam 23. Kor 25. Oya 27. Ak



Tanur asoba anogo nung salem osang den noksa angati adokdaktsünura - Tenüng, Küm, School, Talidak & salem osang tejangja züller, noksa (photograph - any size) ka den anogo 3 mesüra 4 jelia e-mail : tiriyim@gmail.com nung yokang mesüra Tir Yimyim bureau tem nung agüjang.

1. Tenüng :
2. Tasoba anogo :
3. Küm :
4. Class :
5. School :
6. Talidak :
7. Salem osang :

**Tepela
Tasoba Anogo**


Happy Birthday

TENÜNG : ARENMONG JAMIR

Küm : 1
 Tasoba anogo : 24 November
 Talidak : Yongyaba Ward,
 Tzüdkong
 Anük ARENMONG sor küm 1 tashi anema tokja temoatsü nung len aniba asoshi Tsüngrem tenüng asanger. Maneni arishi talang, anema aliba taküm den Tsüngrem meteta ajemaloa Pa tsüngsü nung jajatetba taküm ka südakjang ta onoki na asoba anogo nung sarasademja amunger.
 ~ Temeim Oko Akümdong Tzudir & Amo

Assam: Tinsukia nung ULFA-I züngsem ka apu

Guwahati, Yimpoksüi/ November 23 (Agencies):

Tinsukia, Assam nung police-i United Liberation Front of Assom-Independent (ULFA-I) züngsem asütsü ta temulung meleme bilemertem rongnung pa-a meleme bilemberga nisung ka Brehostibarnü puogo.

Osang ajanga ashiba agi, iba nisungba ya Bodhbarnü nikongtsütsü Dirak nung grenade ka merepoktsüba dak sendakba nung puogo.

Osang ajangsa, police temi pua alisaeng ya ULFA-I züngsem ka lir.

Police pua aliba ULFA-I züngsem ya Achyutanand

Neog ta jangjaogo, shiba dang nung grenade ka merepoktsüba liasü.

Grenade ya Dirak gate nung

19 Grenadiers gate jakdang aonung 7:40 ako nung pokdakja liasü.

Osang agütsüba mapang tashi nung iba lendong nung nisung asüba indang osangbo kecha maliasü.

Security forces-i iba tesem ajunga longbangogo aser bomb pokloktürtem bushi tenzükogo.

Source balala ajanga ashiba agi, ULFA-I puri longka aitba sentong ka ayongzüker aliba magi tsüngda parnok aliba metedaktsütsü asoshi iba tesem ya maka liasü.

Sikkim: Bhaichung Bhutia-i aniba party SDF den longjemogo

Gangtok, Yimpoksüi/ November 23 (Agencies):

Sikkim nung yimden yimsüuba tsütsü temelensi adoka Hamro Sikkim Party tir Bhaichung Bhutia-i, par party SDF party den loktepogo aser Rabongla, South Sikkim nung Brehostibarnü SDF sentong ka nung Pawan Chamling-i aniba party den longjemogo.

Iba temelensi ya Pawan Chamling-i aniba party asoshi tajangzük tulu ka ama reprangeter, kechiyong taoba CM yagi state nung tang sorkar aija aradar.

Chamling-i, 'Save Sikkim' mission ta nüngja agütsür political campaign ka amenokogo, koba Sikkim nunger tem ajangzükdaktsütsü nükjidong nung amenokba lir.

Chamling-i ashiba agi, tang

**Bhaichung Bhutia**

amenokba sorkar ochi mashi inyakyim agi sünga lir aser parnoki state nung Sikkim nunger ajungkettsü atema kecha minyaker.

Taoba mapang India nunger international football asayar ya Chamling indang SDF party den 'Save Sikkim' mission nung

denogo.

Kechiba tanga party den masü saka SDF den longjem ta asüngdangba mapang Bhutia-i, "ochi mashi lenirtemi party toktsüba sülen SDF mereka kümogo. Mapang talangka SKM-i, Chamling ya ochi mashi lenir ka ta shia aruogo, saka küm pezü tsüngda SKM-i ochi mashi dak sendakba nung Chamling anema ken o ka danga benokteta mali. Anungi iba ajanga Chamling ya ochi mashi inyakyim kecha nunga sendaka mali ta kuli agütsür. Iba dak alia küm pezü tashi opposition ka ama inyakba mapang SDF kijai Sikkim atema jembiogo aser Save Sikkim sentong amenokba ajanga kasa kuli agütsür. Bhaichung aser SDF ya World Cup atema Messi aser Argentina ama asütsü," ta ashi.

Manipur nung PREPAK züngsem ana apu

Imphal, Yimpoksüi/ November 23 (Agencies):

People's Revolutionary Party of Kangleipak, (Progressive) PREPAK-Pro nungi züngsem ana Bodhbarnü aonung Manipur yimtiba Imphal nung prangbong injang bener lia

liasü.

Singjamei bazaar nung PREPAK-Pro züngsemtem mungzüka aliba indang osang tejangja ka angazükba sülen aonung 11 aco meta iba tesem meita oa liasü, ta police-i ashi.

Itangitertem osang dak ajemdaiker police-i meita aoba mapang telungpurtem mena aliba gari ka sota liasü.

Police source kati ashiba agi, Bodhbar aonung Imphal West District nung Singjamei police station kubok Pishum road nung tesem kar meita aoba mapang telungpur ana ya pua

magazine ka, wireless set ka aser mobile handset ponuguteta liasü.

Police temi pua alisaeng ana ya Thoubal Okram yimtsüng nungi arishi küm 33 tain Laisram Prem aser Nambil Phojing yimtsüng nungi arishi küm 41 tain Khumukcham Biren ta jangjaogo.

Police temi pua alirtem den külemi parnok ket nungi ngutetba prangbong injang aser hadirtem Singjamei police station nem bendanga agütsüogo.



Imphal: Manipur nung tang mepetmesü adoker aliba ajanga tatidang magütsüti aliba medical kaketsirtem atema takokba tashi inyaktsütsü ta Manipur sorkari tenangzükba agütsüogo. Manipur University kubok mezüngbuba küm tatidang magütsüdaktsüba atema Kuki-Zo kin nungi medical kaketsirtem longkak aitba sülen iba osang ya sangdonga liasü.

Taoba Pakistan PM Khan ano court kati jaoker

Islamabad, Yimpoksü/Nov. 23 (Agencies): Linük indang miiminyaksangshi temai adokba ken o ka dak sendakba nung Pakistan nung aliba court kati ketdangsürtem dang tang tepuokdak yua alisang taoba ato kilonser Imran Khan ya taruba hopta okadaki anir arutsü shiogo.

Linük yimtiba Islamabad nung Official Secrets Act kubok amenokba special court kati, Khan aser ano tepuokdak yua alisang taoba foreign minister Shah Mehmood Qureshi na okadaki November 28 nü anir arutsüla, ta Brehostibarnü ashi.

Khan ya 2018 nungi 2022 tashi ato kilonser inyakba mapang bendanger lenirtem aser sorkari sempet agütsüba ozüng alema ayokba dak sendakba ken o danga ka nung August ita tepuokdaki yokba sülen pa asoshi yimjak nung ibai mezungbuba nokdaker asütsü.

"Tang onoki iba totuyuba nung aliba ama inyaktsüla," ta Khan indang okatsür Naeem Panjutha-i X (Twitter) nung Brehostibarnü ashi.

Arishi küm 71 tain Khan ya 2022 küm April ita parliament nung no-confidence vote ajanga ato kilonser menden nungi atsüngdoka liasü aser iba inyakyim ya United States ajanga tasa yanglur pa indang political opponents aser tashi tait mitkar den lungjemer inyak ta pai tenüng asener.

Iba inyakyim atema pai US dak tai tongloksüba kuli sayutsü asoshi iba mapang US nung Pakistan ambassador inyaka alisangi yokba diplomatic cable

North Korea-i South den military pact ajunga anentsü

Seoul, Yimpoksü/Nov. 23 (Agencies): Mitkar tsütsü tensa tejamba kumdaktsütsü nükjidong nung South Korea den tezüngzüktep ka yanglur küm pongu tashi amshia aruba North Korea-i rakaogo aser linük ana tsüngta tensa tamajungba akumer.

Mongulbarnü Pyongyang-i spy satellite ka anünglaki takok ngua yoktetogo ta ashiba sülen iba tensa ya tenziük.

Iba yongji South Korea-i iba agreement ya shilem kar anena arütsülen surveillance flights yoktsü shia liasü.

Tangbo Pyongyang-i iba tezüngzüktep ajunga agiener arütsü leni sepa aser hadir tulutem yoktsü nangzük.

"Tang nungi tenziük asem mitkartem September 19 North-South Military Agreement agi malentsü," ta North Korea-i sangdong ka nung ashi.

Ali, tzüyim aser anüng densema ajaklen mitkar raraba nokdangtsü asoshi mera agia aliba ajunga agentsü aser arütsülen tashi taitba armed forces aser new-type military hardware yoktsü parnoki nangzük.

(Maneni tapak 8 nung...)

mesüra cypher ta kaket kar amshia sayu. Saka iba taitsüba ya Washington aser Islamabad nati magizüker.

Pa ato kilonser menden nungi atsüngdokba sülen Khan-i rally aiben ayongzüka pa melensang Shehzad Sharif aser mitkar temi pa atsüngdoktsü tasa yanglu ta aitsüba ajanga par Pakistan Tehreek-e-Insaf (PTI) party züngsem temi linük tesem balala nung longkak aita liasü.

Sorkari item longkak aiter pua merenshiba mapang kiralongraba, nisung tepssetba aser sorkar anema nokdaktsü ajungmesoa o jembiba densema Khan aser par party nung lenurtem anema ken o balala benoka liasü.

Yimtenen tsütsü tajangzük agitsü mechı Khan-i diplomatic cypher nung aliba temai adoktsü ta Pakistan ketdangsürtemi tai tongloksü aser kasa ken o nung Qureshi ya apu.

Linük atema sempet agütsüba yoka achiba ken o nung Khan tepuokdak küm asem ayutsü August 5 nü obendang agütsü Court kati August 29 nü pa nem bail agüjaka pa tepuokdak lir aser cypher ken o ya maneni tepuokdak jembir.

Ajisüaka tepuokdak ken o jembiba ya ozüng alema lir aser taoba ita tai tongloksüba densema iba ken o nung tang tashi jembishinüba ajak tazüng kumtsür, ta Islamabad High Court ajanga Mongulbarnü sangdonga liasü.

Pakistan nung kanga tongtipang general election agitsü lia Khan anema ken o timba akumer, kong PTI party yagi takok tulu angutsü imlar, saka PTI tekolahba Khan ya election nung tokteptsü memlar.

Israel army-i Gaza nung al-Shifa Hospital director puogo

Tel Aviv, Yimpoksü/Nov. 23 (Agencies): Israel army temi al-Shifa Hospital indang director puogo, koba Gaza Strip nung mozüki tulutiba lir.

Muhammad Abu Salimya den senior doctor ishika puogo, ta iba mozüki nung department chief Khalid Abu Samra-i osangbener dang Brehostibarnü ashi.

Salimya apuba ya Israel Broadcasting Authority-ia ashi aser par kinunger Adham Abi Selimya-ia social media nung jangjatsü.

Parnok ya shirangertem den WHO convoy ka nung oya lia Israel sepaitemi anendaktsü aser apu ta ashir, aser iba atema World Health Organization nungi telangzüba aginer, ta Gaza indang ministry of health ajanga ashi.

"World Health Organization ajanga tashi tashi onok dangi iba densa indang osang kecha mayok. Al-Shifa den osangtsüsang magiteptetba ajanga shibasa pua aliar memetet... Pua alir karbo tepsattsü akok. Occupation forces temi itemji inyaktetsü ta onoki meteta lir," ta health ministry indang odongtar Ashraf al-Qudra-i ashi.

Iba tatalokba insang osang ka magütsü tashi ministry ajanga nisungtem anizüker aotsüba atema WHO den amalitep anena atatsü telemtetba agiogo, ta pai ashi.

Hamas-ia sangdong ka nung Salimya aser pa den külemi inyakertem apuba aitsü aser International Committee of the Red Cross aser danga lokti tentet dang parnok tekeraba nung chioktsü asoshi inyaktsü ayongzüka liasü.

Salimya aser dangartem aputsü anogo ishika lia Israeli occupation forces temi Palestinian paramedics ana apu, ta southern Gaza nungi osangbener kati Brehostibarnü ashi.

"Iba ya ajanga Gaza Strip nung medical worker, civil defence crew mesüra osangbener tem densema 'immunity' maliba tejanga sayur,"

ta ashi.

Gaza north tsütsü Israel sepaitemi alilen amakba nung al-Shifa Hospital ya nükjidong ka liasü. Army temi iba tesem nungi nüburtem ainshitsü Deobarnü totuyuba agütsü, saka staff kar yangji lir, kechiaser shiranger 180 shi yangji tang tashi lir.

Taoba hopta iba mozüki meita aor Israel army ajanga ashiba agi, Gaza City nung Hamas telungpuri iba ozüki telung nung longpok aliba amshia lendong agütsü. Ajisüaka Hamas aser mozüki ketdangsür temi iba ama tai tongloksüba khenyongi magizüker.

Gaza north tsütsü Indonesian Hospital nung alirtem iba tesem yutsür aotsü Israel army temi ghonda ka dang agütsü, ta Gaza indang Heath Ministry director-general Munir al-Bursh-i Brehostibarnü ashi.

Yashi iba mozüki nungi shiranga alir nisung 450 anizüker aoba sülen ano nisung 200 shi anünga lir, saka tesem ajaklen bomb pokloksüba manener, ta pai ashi.

"Iba mozüki ya Gaza Strip north tsütsü tang tashi lapoka aliba central hospital tongtiba ama züngshir, aser iba den ano dangi central hospital ana lir. Item mozüki nung shiranger, medical workers aser tesem balala nungi jena arurtem lir," ta osangbener kati ashi.

"Al-Shifa aser Indonesian hospital nung tang tashi timtem lir, kechiaser Israel sepaitemi tang tashi lungbanger lir aser parnoki anishir," ta ashi.

UN humanitarian office

ICMR-NATIONAL INSTITUTE OF NUTRITION
INDIAN COUNCIL OF MEDICAL RESEARCH
Jamai-Osmania (P.O.), Tarnaka, Hyderabad-500 007, Telangana State, India.
Advt. No. 273/Projects/DABS/Phase-II/Nov./2023 Date : 23.11.2023

WALK-IN-INTERVIEW

"Diet and Biomarker Survey in India (DABS-I)" nüngia agütsür ICMR ajanga senotsü tevari agütsüba Pan India Study atema iba Institute nung khen atema Project Posts balala asoshi Walk-in-Interview alitsü. Interview ya November 28-30, 2023 anogotem Kohima, Nagaland nung alitsü. Name of the Post, Age, Essential Qualifications, Number of Vacancies, Emoluments etc., amala indang tali tejangjaba metetsü asoshi onok indang website: nin.res.in/employment.html nung angutsü.

Sd/-
Sr. Administrative Officer
for Director

The collage features several elements:

- Banner:** A large white banner with the text "FOOD AND MUSIC FESTIVAL" in large, colorful letters. Below it, smaller text reads "A PRELUDE TO HORNBILL".
- Logos:**
 - Ministry of Tourism logo (Government of India).
 - Nagaland Tourism logo.
 - Logo for the Hornbill Festival.
- Food Images:** Several photographs of various dishes, including what looks like a meat dish and a vegetable stir-fry.
- Music Image:** A photograph of a person playing an electric guitar on stage.
- Text at the bottom:** "LIVE MUSIC CONCERT", "FOOD STALLS | KID'S CARNIVAL | ART INSTALLATIONS", "BOOK CORNER | PHOTOBOTH", "LOVER'S LOCK | AND MORE...", "24TH-25TH NOV 2023", and "imagi.LAND KISAMA, HERITAGE VILLAGE FROM 10 AM-10 PM".

KDCA asayamung: Missionshire CC & Elite CC final-i iogo



Kohima, Yimpoksüi/ November 23 (TYO): Kohima District Cricket Association (KDCA)-i ayongzüka Jakhama village Ground nung tang asaya aliba Inter Club T20 Tournament nung tanü Missionshire Cricket Club aser Elite Cricket Club nati pei tata asaya koka final-i iogo.

Mezungbuba semi final nung Missionshire CC-i run 36 agi Brotherhood Team koka liasü.

Mezung batting amenba sülen Missionshire CC-i over 20 nung asayar 7 out ser run 182 yanglu liasü. Parnok rongnungi Moin Uddin-i out mesüi run 101 yanglu asayamung nung mezüngbuba century yanglur aser pa nem teyari agüja Sayed-ia run 26

Run arishiba mapang Brotherhood Team-i over 20 nung asayar 9 out ser run 145 dang yangluteta asaya makok.

Parnok rongnungi Mengu Sachü-i run 43 aser Dziesengulie-i run 36 yanglu liasü.

Missionshire atema Aktar Khan-i over 4 nung run 16 agütsür wicket 3 agi. Iba asaya atema man of the match naroküm Moin Uddin nem agüja liasü.

Brehostibarnü tanabuba asaya nung Elite Cricket Club-i run 117 agi Pfuchatsumia Eagles kokogo.

Pfuchatsumia Eagles-i toss akokba sülen mezüng bowl asütsü shim. Mezung batting

amenba sülen Elite Cricket Club-i over 20 nung wicket 8 out ser run 174 yanglu. Parnok rongnungi Samuel-i run 52 aser Zidu-i run 47 yanglu liasü.

Thinuokuolie aser Mhaphruonizo nati Eagles atema wicket anana agia liasü.

Asaya tanabuba shilem nung Pfuchatsumia Eagles puri over 15.5 nung asayar ajak out ser run 57 dang yangluteta liasü. Parnok rongnungi Khrietuo-i run 24 yanglu. Eagles pur atema Sepichem-i wicket 4 aser Zhaliertuo-i wicket 2 agia liasü. Man of the match naroküm Samuel nem agüja liasü.

Kasa mapang nung KDCA-i, final asaya ya November 27 nü NCA Stadium, Sovima nung 12 ako nungi tenzükä asayatsü ta metetdaktsüogo.

(75Kg), Hardik (80Kg), Hemant (80+ Kg).

Tetsür: Neha Lunthi (46Kg), Payal (48Kg), Pari (50Kg), Nisha (52Kg), Amisha (54Kg), Vini (57Kg), Joyshree Devi (60Kg), Shruthi (63Kg), Nidhi Dhull (66Kg), Akansha (70Kg), Kritika (75Kg), Megha (80Kg), Prachi (80+Kg).

Junior WBC atema India team sangdongogo

Yimpoksüi/November 23, asayatsü.

2023 (Agencies): Yerevan, Teburtem rongnungi Armenia nung asayatsü aliba IBA Junior World Boxing Championships nung India tenüng nungi asayar 26-i shilem agitsü renema lir.

Iba asayamung ya November 24 nungi tenzükä December 4 nü tashi asayatsü. Asayamung nung linük 58 nungi lanur asayar 448 weight category 26 tashi nung toktepba angutsü.

2023 Asian Youth aser Junior Boxing Championships nung kanga junga asayaba sülen India nunger junior asayartem pei sasa dak kanga temulung lemteta lir. Parnoki iba asayamung nung medal 21 angu, kong tetsürtemi medal 13 aser teburtemi medal ti ngua liasü.

Asian asayamung nung gold medal angur Brijesh (46kg), Divash (50kg), Yogesh (57kg), Rahul Kundu (70kg) aser Hardik (80kg) nunger ajak Junior World Championships nung India tenüng nungi pei tata category tem nung

Tetsürtem junior section nung Asian Youth aser Junior Boxing Championships gold medalist - Pari (50kg), Nisha (52kg), Nidhi (66kg), Akansha (70kg) aser Megha (80kg) nungera pei tata category nung asayatsü.

Maneni tetsürtem rongnungi Neha (46kg), Payal (48kg), Amisha (54kg), Vini (57kg), Joyshree Devi (60kg), Shruthi (63kg), Kritika (75kg) aser Prachi (80+kg) nungeria shilem agitsü.

Asayartem:
Tebur: Brijesh (46Kg), Sikandar (48Kg), Divash (50Kg), Sahil (52Kg), Jatin (54Kg), Yogesh (57Kg), Sarthi Saini (60Kg), Kabiraj Singh (63Kg), Prashant (66Kg), Rahul Kundu (70Kg), Sahil

Mkg Departmental asayamung tenzükogo

Dimapur, Yimpoksüi/ November 23 (TYO): Mokokchung nung 1buba Inter-Departmental Sports Tournament 2023, November 23 nü Multi-Sport Complex nung tenzükogo.

Iba asayamung ya District Planning & Development Board tawabangba kübok ayongzüka asayadar. Asayamung ya public servants tem yongtsü nung tangatetep aser telongjem tali adokdaktsütsü nükjidong nung ayongzüko.

Asayamung lapokba sentong nung Additional Deputy Commissioner aser organizing committee züngsem Chuhamo Humtsoe-i lokti pela agizükba o jembia liasü.

Humtsoe-i ashiba agi, iba amala asayamung ajanga public servants tem pei official designation kechi südir süaka ajak shilem agir kaka ama sabang ka nung adenshidaktsü aser iba ajanga tesendaktep talí liasü.

Anogo asem asayatsü aliba asayamung nung Badminton, Table Tennis, Carom, Chess, aser Arm Wrestling asayatsü.

China Masters: Prannoy, Satwiksairaj & Chirag nunger quarter-i iogo

Yimpoksüi/November 23 (Agencies): India nunger nüngtugu badminton asayar HS Prannoy aser Asian Games nung gold medal anguba tarep Satwiksairaj Rankireddy aser Chirag Shetty nunger Brehostibarnü tang asaya aliba China Masters badminton asayamung nung pei tata asaya koka quarterfinal-i iogo.

World championship bronze medallist Prannoy ya tebur kija asaya nung India nunger asayartem rongnungi pa kija anunga lir aser pai Brehostibarnü pre-quarterfinal nung Denmark nunger asayar Magnus Johannesen 21-12 21-18 agi ayong ayonga koka liasü.

Prannoy ya iba asayamung nung seed tibuba asayar lir aser pa quarter final nung Japan nunger asayar Kodai Naraoka den asayatsü.

Prannoy dak alia world no.5 aser top seeds Satwik aser tanabuba set koka liasü.

North Korea-i South den military...

Pyongyang-i Mongulbar nikongdang Malligyong-1 spy satellite lir südi ta amangba rocket ka anünglaki khaketa yok aser iba maparen takok nguogo ta shia liasü.

South Korea mitkari mapang tatsüka lir iba satellite ya orbit telungi yiogo ta ashi saka iba satellite ya mapa inyaker asü masüar ashitsü kerara, ta ashi.

Seoul-i iba rocket khaketa yokba ya sashi-sashia aitsü aser Bodhbarnep ketdangsürtemi tangsa arütsülen surveillance operations tenzükshitsü molungtep, koba ajanga South Korea-i North Korea indang outposts aser long-range

(Tapak 7 nungi...)

December ita Pyongyang-i drones kar South Korea arütsü alema yok aser kabo linük yimtiba Seoul tonga liasü.

Iba tezungzüktep shilem kar mamshitsü atema Seoul-i tamdaktsü kuli agütsüba nung itemji dena lir aser North-i yangji manidaker ta ashir.

Pyongyang-i spy satellite yokba ya par "right to self-defence" nung shilem ka lir ta ashir, saka South Korea, US aser Japan linük temi sashi-sashia aitsüogo.

BILEMDANGANG

"Koba lokti nung na mapet iba loktiji tokjang."